

Här Fernand Etgen
President vun der Chamber



FRAKTIOUN

Membre de la Commission de l'Agriculture et du Développement rural, 8
Référence: 719/2021
15.11.2021
A traiter par:
Copie à:

Lëtzebuerg, den 12. November 2021

Här President,

Esou ewéi den Artikel 80 vum Chambersreglement et virgesäit, bieden mir lech, dës parlamentaresch Fro un den Här Wäibauminister, den Här Wirtschaftsminister an den Här Minister fir Mobilitéit an ëffentlech Aarbechte weider ze leeden.

An der Schengen Lounge vum Lëtzebuerger Pavillon op der Expo 2020 zu Dubai fënnt een, nieft enger Selektioun u Lëtzebuerger Wäin a Crémant, eng ganz Rëtsch Wäiner aus aller Häre Länner, sou wéi franséische Champagner. Et muss een och feststellen, datt dës Produkter zum Deel zu engem vill méi bëllege Präis ugebuede gi wéi eis Lëtzebuerger Qualitéitswäiner a Crémanten.

An dësem Kontext géife mir gäre folgend Froen un d'Regierung stellen:

1. Dubai 2020 soll eng Fënster sinn, fir Lëtzebuerg a seng Produktiounen engem Weltpublikum virzestellen. Da wär et dach normal, dat nëmme Lëtzebuerger Wäiner a Crémanten am Lëtzebuerger Pavillon ugebuede ginn. Aus wéi engem Grond ass dat net esou, a firwat ginn och Net-Lëtzebuerger Wäiprodukter ugebueden ?
2. No wéi enge Critèrë goufen déi aner Produkter ausgesicht ?
3. Deelt d'Regierung d'Meenung datt et am Kader vun esou enger Expo, wou ee säi Land presentéiert, net sënnvoll wier, wann exklusiv déi national Produkter ugebuede ginn ?
4. Wa jo, wéi goufen d'Präisser fir déi Lëtzebuerger Produkter festgeluecht ?
5. Gëschter war an eiser Chamber eng Interpellatioun iwver de Lëtzebuerger Wäibau a seng Zukunft, mat enger eenhelleger gedeelter Meenung, datt méi Promotioun fir seng Commercialisatioun soll gemaach ginn. Firwat handelt d'Regierung net an deem Sënn?

Här President, mir bieden lech eisen déifste Respekt unzehuelen.

Octavie Modert

Léon Gloden
Deputéiert

Françoise Hetto-Gaasch



Gemeinsam Äntwert vum Wirtschaftsminister, Franz Fayot, a vum Minister fir Landwirtschaft, Wäibau an ländlech Entwécklung, Romain Schneider, op d'parlamentaresch Froen n°5221 vum 12 November 2021 vun den Deputéierten Octavie Modert, Françoise Hetto-Gasch a Léon Gloden an n°5226 vum Deputéierte Marc Goergen zu der Promotioun vu Lëtzebuenger Wäiner op der Expo Dubai 2020

Wéi bei viregte Participatioune vu Lëtzebuerg bei Weltausstellungen ass d'Presenz vum Pavillon op der Expo 2020 Dubai an de Vereenegten arabeschen Emiraten (VAE), eng excellent Geleeënheet fir de Grand-Duché, seng Wäerter an seng Errongenschaften an der MEASA-Regioun (Mëttleren Osten, Afrika a Südasien), déi 72 Länner zielt mat enger Gesamtbevëlkerung vun 2,8 Milliarde Mënschen ëmfaasst, ze presentéieren.

Mat der Ëmsetzung vun der Lëtzebuenger Presenz op der Expo 2020 Dubai ass 2016 ugefaange ginn. Et ass vum Ufank vum Projet un decidéiert ginn, daat Kulinarescht an d'Wäiner am Restaurant vum Lëtzebuenger Pavillon Schengen Lounge ervirzehiewen. De Restaurant gëtt vum Lëtzebuenger Stärekech Kim Kevin de Dood an zesummenaarbecht mat Jumeirah Group an der Luxembourg School of Hospitality and Tourism (EHTL) geleet.

An deem Sënn huet d'Generalkommissärin en Prozess ageleet fir de Lëtzebuenger Wënzer ze erméigleche mat hire Wäiner am Restaurant vum Pavillon vertraueden ze sinn. Mat der Hëllef an der logistescher Ënnerstëtzung vum Institut Viti-Vinicole sinn d'Wäiner bei engem „Blind Tasting“ ausgewielt ginn. Dës Demarche war un all d'Wäinproduzente vun der Lëtzebuenger Musel geriicht, fir Wäiner ze fannen déi am beschten zu de proposéierte Menüen passen, déi zum gréissten Deel vun traditionelle Lëtzebuenger Platen inspiréiert sinn. Vun den 106 Testprouwe sinn der 6 ausgewielt ginn, ee Wäin pro Wäinzort (Riesling, Auxerrois, Pinot Blanc, Pinot Gris a Pinot Noir) an ee Cremant. Insgesamt sinn 3.600 Fläsche bei den ausgewielte Wënzer bestallt ginn (600 Fläsche pro Zort).

Et ass wichteg dorobber hin ze weisen, datt di Lëtzebuenger Wäiproduzente net an d'VAE exportéieren. Di zwee eenzeg emiratesch Betriber di eng Akkreditatioun hunn fir Alkohol an d'VAE ze importéieren, hate bis elo keng esou Lëtzebuenger Produite an hirem Portefeuille. Aus där Ursach huet de GIE Luxembourg @ Expo 2020 Dubai d'Initiativ geholl fir alles ze organiséiere wat mam Transfert vun de Lëtzebuenger Wäiner dohinner ze doen huet. Dozou gehéiert den Akaf vun dese Wäiner bei de Lëtzebuenger Produzente, d'Erleedege vun de komplexen administrative Formalitéite grad ewéi d'Iwwerhuele vun all de Käschten déi beim Import vu Gedrénks an lesswueren an d'VAE ufalen ewéi d'Douanestaxen, d'Transportkäschten, d'Akzisen um Alkohol an d'Taxe fir den Organisateur vun der Expo. All des Käschten hunn eng Auswierkung op de Verkafspräis vun de Wäiner an der Schengen Lounge, wuel wëssend datt de Bedriever vum Restaurant op deene Produit'en quasi kee Benefice mëscht.

Aus kommerziellen a reglementaresch (sanitären asw.) Grënn, war et noutwendeg fir d'Exploitatioun vun der Schengen Lounge engem externe Prestataire, dem Grupp Jumeirah ze iwwerloossen deen dann och de kommerzielle Risiko dréit deen domadder verbonnen ass. De Verkaf vu Lëtzebuenger Wäi war eng vun de Bedingungen un déi sech de Grupp Jumeirah hale muss, och wann dëse Bedreier zousätzlech d'Méiglechkeet huet fir di gastronomesch Offer am Restaurant mat Wäiner aus anere Länner ze erweideren. Dofir ginn di Lëtzebuenger Wäiner och bewusst an der Schengen Lounge systématéiert ervir gehuewen, an dës Demarche gëtt bis zum Enn vun der Expo weider verstärkt. Dat geschitt mat Hëllef vum Lëtzebuenger Kichechef Kim Kevin De Dood an de Mataarbechter vum EHTL di domadder zousätzlech zu der Lëtzebuenger Empreinte vum Restaurant am Pavillon an de Produiten di do kommerzialiséiert gi bäidroen.

No 6 Wochen Aktivitéit an der Schengen-Lounge sinn ongeféiert 600 Fläsche verkaaft ginn, dorënner ware 60% Lëtzebuenger Wäiner an Cremanten a 40% aner Wäiner.

Et ass eng Tatsaach, dass an deene meeschten anere Pavillonen op der Expo 2020 vu Länner, wou och Wäi produzéiert gëtt, sech déi gastronomesch Offer net op national Wäiner limitéiert, mee och Produiten aus anere Länner ëmfaasst.

Luxembourg, le 16/11/2021

Le Ministre de l'Économie

(s.) Franz Fayot